

Script of Evening Gojri News Bulletin 25 July 2024 at 1700 Hrs

ایوننگ گو جری نیوز بلیٹن مورخہ 25 جولائی 2024

یوہ آکا شوانی جموں بے محمد مبارک ماہر تے طارق ابرار تیں خبر سنو۔ پہلاں خاص
خاص خبر۔

- *1۔ لیفٹنٹ گو رنر منوج سنہا نے کہیو بے جے خواہش اور عزم دو ایسی اہم چیز ہیں
جہیڑی طالب علمان نانہہ مواقعان غی تلاش اور آہستہ آہستہ وکست بھارت غی تعمیر مانہہ
کردار نبھان غا سلسلہ مانہہ رہنمائی کریں گا۔
- *2۔ وزیر اعظم نریندر مو دی کرگل وجے دیوس غی 25 ویں برسی منان غا سلسلہ مانہہ
پلک کرگل غو دورو کریں گا۔ وزیر اعظم شنکن لائل پروجیکٹ غا پہلا دھماکہ نانہہ وی
مجازی طور رور انجام دیں گا۔
- *3۔ جموں کشمیر پولیس نے دہشت گردانہ سرگرمیاں مانہہ مدد فراہم کرن آلا 2 افراد نانہہ
کٹھوعہ ضلع مانہہ گرفتار کر لیو بے۔
- *4۔ تے جنوبی کشمیر غا اننت ناگ ضلع مانہہ اس ویلا توڑی 4 لکھ 25 ہزار عقیدت مندان
تے شری امرناتھ گفہ غا درشن کر لیا ہیں گذشتہ سال 4 لکھ 50 ہزار یا تریاں نے امرناتھ گفہ
گا درشن کیا تھا۔

خبراں غی تفصیل نال پہلاں محمد مبارک ماہر۔

LG IUST

لیفٹنٹ گو رنر منوج سنہا نے کہیو بے کہ خواہش تے عزم دو اہم عمل طالب علمان نانہہ
موقعان تیں فاندو چاہن تے وکست بھارت غی تعمیر مانہہ مستقبل شراکت با رے رہنمائی
کریں گا۔ ایل جی موصوف نے کہیو کہ ہم جموں کشمیر غا تعلیمی شعبہ مانہہ بڑا پیمانہ ور
تبدیلی غو مشاہدو کر رہیا ہاں اور منا یقین بے بے کہ اسلامک یونیورسٹی برائے سائنس
تے ٹیکنالوجی یوٹی مانہہ علم اور اختراع غو اک مینار ثابت وے گی۔ یاہ گل ان نے اسلامک
یونیورسٹی برائے سائنس تے ٹیکنالوجی غا کنوکیشن سنگ خطاب کر تاواں کہی۔ ان نے
کہیو کہ منا یاہ گل سن غے خوشی ہونی بے کہ اج سونا غا تمغہ حاصل کرن آلا 27 طلباء
وچوں 22 کڑی تھیں۔ ان نے کہیو کہ ہوں صنعتی مساوات غی اک روشن مثال قائم کرن مانہہ
اسلامک یونیورسٹی برائے سائنس تے ٹیکنالوجی غی قابل ستائش کا میاںیاں غو اعتراف
کروں اور یوہ ادارو تعریف غے لائق بے۔ ایل جی نے کہیو کہ طلباء نانہہ مقامی للکاراں
سنگ مقابلو کرن تے ملک غا روشن اور خوشحال مستقبل واسطے کم کرن خاطر مسلسل
اختراعات کرن غی لوڑ بے۔ ان نے کہیو کہ میرو مننو بے کہ تعلیم غو بنیا دی مقصد طلباء
مانہہ اعلیٰ اقدار اور آزادانہ سوچ پیدا کرنو بے تا نجے قوم غی تقدیر سنوار سکے۔

LG Hakla

لیفٹنٹ گو رنر منوج سنہا نے گذشتہ روز منیا پڑمنیا گجر لیڈر، سماجی کارکن اور لکھاڑی
وزیر محمد بکلہ غی شاندار خدمات غا اعزاز مانہہ یا دگا ری ڈاک ٹکٹ غو اجراء کیو۔ اپنا
خطاب مانہہ منوج سنہا نے وزیر محمد بکلہ غی قومی یکجہتی اور پچھڑیا لوکاں غی ترقی
واسطے شاندار خدمات غی تعریف کی۔ وزیر بکلہ نے گوچر بکروالاں غا حقوق واسطے جدو
جہد کی اور اس طبقہ نانہہ شیڈیو لڈ ٹرائب درجہ غی مانگ غی مہم غی قیادت کی۔ لیفٹنٹ گو

رئیر منوج سنہا نے کہیو جے وزیر محمد بکلہ غی مُلک غی سلامتی اور ترقی غی خاطر خدمات گوجر بکروال لوکاں واسطے مشعل راہ ہے۔ ایل جی موصوف نے کہیو جے جموں کشمیر یو ٹی انتظامیہ وزیر اعظم نریندرمو دی غی قیادت مانہہ پچھڑیا لوکاں غی ترقی اُن گا حقوق غی حفاظت خاص طور ر ور قبائلی لوکاں غی ترقی غا مشن واسطے کم کر رہی ہے۔

PM Kargil

وزیر اعظم نریندرمودی پلک کرگل وجئے دیوس غی 25 وی سالگراہ غا موقعہ و ر کرگل غو دورو کریں گا۔ اور اُن بہا در جواناں نانہہ خراج عقیدت پیش کریں گا۔ جنہاں نے اپنی خدمات غی آدائیگی غے دوران بڑی قربانی دتی۔ اس موقع و ر وزیر اعظم نریندرمو دی شنکن لائٹل پروجیکٹ غو پہلو دھماکو عمودی طور و ر کریں گا۔ شنکن لائٹل پروجیکٹ 4عشاریہ 1 کلو میٹر لمی دورستی سرنگ و ر مشتمل ہے۔ جھیڑی لہہ نانہہ تمام موسمی رابطہ فراہم کرن مانہ مدد گا ر ثابت وے گی۔ مذکورہ دورستی سرننگ نیمو پدم دراجہ سڑک و ر قریب 15 ہزار 8 سو فٹ غی بلندی و ر تعمیر کی جائے گی۔ واضع رہ جے اک وار مکمل ہون تیں بعد یاہ دُنیا غی سب تیں اُچی سرننگ وے گی۔ شنکن لائٹل سرننگ نہ صرف مہاری مسلح افواج تے آلات غی تیز رفتار غی موثر نقل و حرکت نانہہ یقینی بناوے گی۔ بلکہ لداخ مانہہ اقتصادی تے سماجی ترقی نانہہ وی بابدو دے گی۔

Kargil Vijay Diwas

کرگل وجئے دیوس کی 25 ویں برسی تیں اک دن پہلاں 1999 غی کرگل جنگ مانہہ مُلک غی تاریخی فتح غو جشن منان واسطے دراس مانہہ لمو چن پوائنٹ و ر اک تقریب منعقد کی گئی۔ جس مانہہ جنگی اہلکاراں، دفاعی اہلکاراں غا رشتے داراں اور مقامی لوکاں نے خصیری تعداد مانہہ حصو لیو۔ دراس مانہہ جنگ غی یاد گا ر کرگل وجئے دیوس غی رجت جینتی منان غی خاطر میزبانی واسطے تیار کی گئی ہے۔ جت 26 جو لائی غا موقعہ و ر وجئے دیوس تقریب منعقد وے گی۔ جس مانہہ وزیر اعظم نریندرمو دی مُلک غی خاطر جاناں غو نذرانو پیش کرن آلا شہیداں نانہہ خراج عقیدت پیش کریں گا۔ تقریبات غے دوران سلامتی اور ضابطاں غی پاسداری یقینی بنان واسطے کرگل غا ڈپٹی کمشنر نے اک حکمنامو جاری کر غے کرگل اور دراس تحصیلاں نانہہ ڈرونس تیں پاک زون رکھن غی ہدایات دتی ہیں۔ ان علاقاں مانہہ کسے وی فضائی گڈی گا استعمال و ر پابندی رہ گی۔ کرگل وجئے دیوس غی رجت جینتی منان غو مقصد بھارتی مسلح افواج غی بہا دری اور قربانیاں نانہہ یاد کرنو ہے۔

EPMKN Samba

مُلک پھر مانہہ ”ایک پیڑ ماں کے نام“ مہم چلائی جا رہی ہے۔ اُت ضلع سانہہ مانہہ وی اس سلسلہ مانہہ ضلع ترقیات کو نسل غا چیرمین کیشوودت شرما نے ضلع غا سرحدی سرکا ری ہائی اسکول محل شاہ مانہہ اپنے ہتھیں بوٹو لا غے شجر کاری مہم غو آغاز کیو۔ مذکورہ مہم سماجی جنگلات غا تعاون نال چلائی جا رہی ہے۔ اس موقعہ و ر ہلاک ترقیات افسر رام گڑھ مکیش شرما غے نال سکولی عملہ طالب علماں تے منیا پڑمنیا شہریاں نے وی حصو لیو۔ مہارا ضلع نامہ نگار ستیال شرما سنگ گل کرتاں واں ضلع ترقیات کونسل غا چیرمین تے بچاں نے اس طرح کہیو۔۔۔ بانٹ۔۔

RS US Advisory

مرکزی سرکار نے کہیو ہے جے امریکی حکومت نے اپنا شہریاں نانہہ جموں کشمیر یاہ مُلک غا دوجا حصاں غو دورو کرن غا سلسلہ مانہہ کوئی ایڈوانزری جا ری کی ہے اس غی کو نے جانکا ری نہیں ہے۔ یاہ گل راجیہ سبھا مانہہ کا نگریس لیڈر دگ وجے سنگھ غی طرفوں چایا گیا ضمنی سوال غو جواب دیتاں واں سیل سفاح غا مرکزی وزیر گجندر سنگھ شیکھوت نے کہیو جے امریکی سرکار غی طرفوں اس غا شہریاں نانہہ جموں کشمیر یاہ مُلک غا کجھ حصاں غو دورو کرن تیں پریز کرن غی کو نے ایڈوانزری جا ری کی ہوئے اس با رے سرکار نانہہ کو نے جانکا ری نہیں ہے۔ انہاں نے کہیو جے دفعہ 370 غی منسوخی تیں بعد سیلانی بغیر کسے خوف غے جموں کشمیر غودورو کر رہیا ہیں۔

یہ خبر تم آکا شوانی جموں تیں سن رہیا ہیں خیراں غا باقی حصہ نال طارق ابرار۔

OGW Kathua

دہشت گردی نانہہ کُچلن غا سلسلہ مانہہ اہم کامیابی حاصل کرتاں واں پولیس سٹیشن ملہار نے دہشت گرداں نانہہ اُن غی دہشت گردانہ سرگرمیاں مانہہ تعاون دین آلا 2 افراد نانہہ گرفتار کر لیو ہے۔ مہارا ضلع نمائندہ پر دیپ شرما نے دسیو ہے جے دہشت گرداں نانہہ مدد فراہم کرن آلا گرفتار ہوا افراد کولے موجود اہم جانکا ری ویلے سر پولیس نانہہ نہ دین مانہہ وی ملوث تھا۔ ان دوہاں نے جان بوجھ غے پولیس کولوں اہم جانکا ری چھپانی تھی۔ اس معاملہ مانہہ پولیس نے 100 تیں متا افراد کولوں پوچھ تاچھ کی ہے۔ اور 40 افراد غے خلاف احتیاطی اقدام لیا گیا ہیں تا نچے سلامتی نانہہ درپیش خطراں سنگ نمڑیو جا سکے۔ اور دہشت گرداں نانہہ ملن آلی ممکنہ مدد نانہہ روکیو جا سکے۔

Amarnath Yatra

جموں کشمیر غا اننت ناگ ضلع مانہہ واقع شری امرناتھ جی گُفہ غا یاترا غا سلسلہ مانہہ پچھلے بہرے 4 لکھ 50 ہزار زائرین نے حاضری دتی تھی تے اس غے مقابلے رواں سال مانہہ مذکورہ یا ترا غا سلسلہ مانہہ 4 لکھ 25 ہزار تیں متا یا تری مذکورہ گُفہ ور حاضری دے چکا ہیں۔ مہارا جموں غا نامہ نگار غی رپورٹ غے مطابق اج بنیا دی کیمپ بھگوتی نگر یا تری نواس تیں 3 ہزار 89 یا تریاں ور مشتمل 28 ووں جتھو وادی کشمیر مانہہ واقع امرناتھ گُفہ غا درشن کرن گا سلسلہ مانہہ نکلی 106 گڈیاں ور تگڑا حفاظتی بندوبست مانہہ روانہ کیو گیو ہے۔ مذکورہ جتھو مانہہ 2 ہزار 2 سو 47 جتا، 7 سو 45 عورت، 73 سادھو، 22 سادھوی تے 2 خواجہ سراہ شامل تھا۔ مذکورہ عقیدت منداں وچوں 1 ہزار 286 بالتال بنیا دی کیمپ واسطے روانہ ہوا ہیں جد کہ 1 ہزار 8 سو 3 پہلگام بنیا دی کیمپ واسطے روانہ ہوا ہیں۔ جتھوں وے اپنو مزید سفر شروع کریں گا۔ واضع رہ جے رواں سال 28 جون نانہہ لیفٹنٹ گو رنر منوج سنہا غا امرناتھ یا تریاں غا پہلا جتھو نانہہ جھنڈی دس غے ٹورن توں بعد ہن تک جموں غا بنیا دی کیمپ تیں 3 لکھ 11 ہزار 4 سو 93 زائرین نانہہ مذکورہ یا ترا واسطے روانہ کیو گیو ہے۔ 52 تہاڑاں ور مشتمل یاہ لمی یا ترا بالتال تے پہلگام غا بنیا دی کیمپاں رواں سال 29 جون نانہہ شروع ہوئی تھی اور یاہ رواں سال 19 اگست نانہہ اختتام ہو جا ئے گی۔

Army Chief Homage

بھارتی فوج غا سربراہ جنرل اوپیندرہ دویدی نے شمالی کشمیر غا ضلع کپواڑہ مانہہ حفاظتی دستاں تے دہشت گرداں بشکار اک ٹاکرا غے دوران شہیدا ہوا فوج جوان نائیک دلاور خان مانہہ پھلاں غو ہار چڑھا غے خراج عقیدت پیش کیو۔ مذکورہ تقریب غو انعقاد سرینگر مانہہ واقع چنار کور غا صدر دفتر بادامی باغ مانہہ کیو کیو تھو۔ اس موقعہ ور فوج غا اعلیٰ افسراں، عوامی تے پولیس افسراں نے وی حصو لیو۔ مذکورہ فوجی سربراہ نے کہیو کہ ہم سارا غم غی اس گھڑی مانہہ سوگوار خاندان غے نال مضبوطی سنگ کھڑا ہاں۔ اس گل غی جانکاری فوج غا اضافی عوامی اطلاع بارے ڈائریکٹر جنرل نے سماجی رابطہ غا اک ذریعہ ایکس ور سانجھی کی۔ واضع رہے مذکورہ شہید جوان ہماچل پردیش ریا ست غا اونا ضلع سنگ تعلق رکھے تھو۔ یوہ گذشتہ روز سرحدی ضلع کپواڑہ غا ترومخان جنگلاں مانہہ اک ٹاکرہ غے دوران خاصو زخمی ہو گیوتھو اور بعد مانہہ زخماں غو درد نہ چہلتاں واں چل بسیو۔ اس ٹاکرا غے دوران اک نامعلوم دہشت گرد وی ماریو گیو۔ یوہ ٹاکرو منگلواریں شام اُس ویلے شروع ہو وُ جد حفاظتی دستاں غی سانجھی ٹیماں نے علاقہ مانہہ مشترکہ کاروائی شروع کی۔ ذریعاں نے دسیو ہے جے علاقہ مانہہ گذشتہ روز تیں گولی با ری غو تبادلہ کیو وی ہے۔ ور علاقہ مانہہ سانجھی کاروائی اجوں وی جاری ہے۔

اس غے نال ہی خبراں غو یوہ بلیٹن ختم ہوؤ۔